

REGIONAL NEWS BULLETIN

HEADLINES (EVENING)

Date – 24/09/2024

Time - 18:30 -18:40Hrs

- Mizoram khaw 16 ah vawiin khan VC Bye Election neih a ni.
- MNF Party chuan kawng chhiat nasat em em chhan chu thal chhunga enkawla siamthat ngai siam loh vang liau liau a ni, an ti.
- President Draupadi Murmu-i chuan tunlai thiaman technology thang chho zel milin Audit dan pawh insiamrem chhoh zel a ngai a ti.
- Sri Lanka National People's Power MP, Dr. Harini Amarasuriya chu vawiin khan Prime Minister thar atan lakluh a ni.

<><><>

VC BY ELECTION

Mizoram hmun 16 ah VC Bye Election neih a ni a, Kan thudawn chinah Serchhip Chhim Veng leh New Serchhip North ah MNF VC member pakhat ve ve an boral avangin an hmun ruak hnawh khat turin Bye election chu tluang taka zawhfel a ni a, Chhim Venga vote 875 awmah 593 tlain hei hi zaa 67.78 a ni a. New Serchhip North ah Vote awm 1606 ah 946 tla in, hei hi zaa 58.91% a ni.

He bye election ah hian New Serchhip north ah MNF, ZPM leh INC ten candidate an nei vek a. Chhim vengah chuan MNF leh ZPM in neiin INC VCP hluuin Independent in a chuh thung a, vote tla hi inthlanna hmun Chhim Veng Primary School hluiah leh Govt.Middle School New Serchhipah te chhiar nghal an ni ang.

Khawzawl District chhunga Khawzawl Dintar Vengah VC seat ngaawmah Member pakhat Pu C.Vanlalena VCP a boral a vangin a hmunruak hnawh khat turin By election neih a ni a.He tih rual hian Khawzawl District chhung tho Chawngtlaiah pawh seat 5 awmah Bye Election hi neih tura ruahman a ni a ,Amaherawh

chu,inthlan that ngai loin candidate chu chuh lohva tlinga puan a ni.

Kolasib khaw chhung Saidan ah VC seat ruak pakhat hnawhkhat turin bye election neih ani a, vote 415 a tla.

Saidan ah hian vote awm zawng zawng chu vote 591 niin, mipa voter 298 leh hmeichhe voter 293 a awm. Vote thlaktute hi mipa 204 leh hmeichhia 211 niin vote tla zawng zawng hi 415 zaa 70ani.

Polling official te chuan vote thlakna hmun an khar tawh a, zanriah an ei zawhah vote tla te hi zan dar 7 vel atangin an chhiar tan ang.

<><><>

AB-PMJAY

Ni hnih awh tur 'State Review Meeting on AB PM-JAY 2024' chu Health & Family Welfare Department hnuaia Mizoram State Health Care Society, State Health Agency ni bawh huaihawtin vawiin khan Dawrpui Multipurpose Hall, Aizawlah hman tan a ni.

Ayushman Bharat Pradhan Mantri Jan Arogya Yojana (AB PM-JAY) hi September, 2018 atangin Mizoramah hman tan niin, chhungkaw khawsak harsa leh dinhmun hnuaihning zawk thlanchhuah (Socio Economic Caste Census 2011 leh RSBY 2018) bakah Ration Card eng (yellow) leh pawl (blue) nei chhungkuate tana duan a ni a. He scheme hmang thei chhungkaw member tinin Ayushman Card/Golden Card an neih a ngai a, tun thlengin Mizoram chhungah Ayushman Card/Golden Card 5,65,428 siam a ni tawh a ni. Vawiin thlengin he scheme hi mipuite'n a thlawna damdawiina inenkawl nan tum 1,12,000 an hmang tawh a; heng inenkawlna senso atan hian sawrkar chuan cheng vbc 123 nuai 45 sing 8 & 6,300/- a hmang tawh a ni.

He hunah hian Mizoram State Health Care Society CEO Dr. Biakthansangichuan AB PM-JAY hlawhtlinna hrang hrang an neihte bakah harsatna hrang hrang an lo paltlang tawhte leh hmachhawp awmte a tarlang a. Health Care Scheme thar lo awm tur Mizoram Universal Health Care Scheme (MUHCS) kalphung tur inzirtirna hun neih a ni a.

Mizoram chhunga AB PM-JAY hman kawnga Hospital leh mimal tithate chawimawina hun hman niin, Mizoram puma AB

PM-JAY hnuai District Hospital titha ber chu Lunglei Civil Hospital niin, lawmpuina certificate leh pawisafai cheng nuai 1 hlan an ni a. CHC/SDH category-ah Vairengte CHC chu titha ber niin lawmpuina certificate leh pawisafai sing 7 hlan an ni a. PHC category-ah Kawrtethawveng PHC chu titha ber niin lawmpuina certificate leh pawisafai cheng sing 5 hlan an ni a; heng bakah hian District tina Arogya Mitra thawk tha thlan chhuahte hnenah chawimawina certificate leh pawisafai hlan a ni bawk.

<><><>

MSCW CHAIRPERSON

Mizoram State Commission for Women (MSCW) Chairperson Pi C. Lalchhandami'n banna a thehluk chu pawmsak a ni a, a ai awh rih turin Commission Member ni lai Pi K. Lalremruati ruat a ni.

Social Welfare, Tribal Affairs, Women and Child Development Department thuchhuah tarlan danin MSCW Chairperson Pi C. Lalchhandami banna thehluk an pawm bakah Governor remtihain a aiawh turin Commission Member ni lai Pi K. Lalremruati chu ruat a ni a, Chairperson tur ruat anih hma chu he dinhmun hi a chelh dawn a ni.

Puan tawh thin angin eptu party MNF leh zirlai pawlte'n bang tura an nawr Mizoram State Commission for Women (MSCW) Chairperson Pi C. Lalchhandami chuan September ni 7 khan banna a thehlut a. A banna lehkhah chuan MSCW-a Chairperson atana ruat a nih chungchangah eptu political party-te atanga beihna nasa tak a tawh thu a tarlang a. He dinhmun hi kum 65 tlin thlenga chelh theih a nih avangin a kum dik tak ang chuan he dinhmun hi la chelh zui zel thei tur la niin a insawi a. Chutiang a nih rualin hetiang boruak karah chuan chak tak leh tha tak, phur taka hnathawh zui a harsa dawna a hriat thu a sawi a ni.

Pi C. Lalchhandami hian a awmna ZPM party hruiute a biak râwn hnuah hetiangah party inchirhthehna tha lo tak awm zui tur hi tha a tih loh avang leh, Women Commission zahawmna vawnhina'n Chairperson a nihna atanga banna a thehluk tak thu a sawi a ni.

<><><>

MNF PRESS CONFERENCE

MNF General Secretary, Pu K. Sawmvela chuan, kawng chhiat nasat em em chhan chu thal chhunga enkawla siamthat ngai siam loh vang liau liau a ni, a ti.

MNF Media & Publicity ten vawiina Aizawl Press Club-a thuthar lakhawmtute an kawmna ah, MNF Gen Secy leh PWD Engineer in Chief hlui ni bawk Pu K. Sawmvela chuan Kawnpui leh Khamrang inkar kawng chhiat chungchangah, Chief Minister in eptu lam an nih laiin ZPM a sorkar ruala kawng chhia tihbo an tum thu a sawi chu, thla 9 an sorkar hnu ah kawng chhia chu a tibo ta em tih chu mipuite chhan tur nise a ti a, November-April chhung hian kum dangah chuan sum awm ang angin PWD hian khawpui leh kawng dang pawh an repair thin a ni a. Kumin hi chuan sum neih loh vang nge hmun hrang hrangah repair hmuh tur a tlem hle a, kumin hian thal laia a hun taka repair chu nise tun ang hun hi chu pumpelh theih ngei tur a ni, a ti.

Silchar kawng pawh State mawhphurhna a ni lo, NHIDCL mawhphurhna a ni ti mai lovin, kawng a chhiat miau chuan a tuartu mipui an nih avangin a tawpa mawhphurhna latu chu State Sawrkar neitu a ni tih pawm a, nakin zelah pawh mawhphurhna la ngamlo ang ziazanga midang puhmawh tur zawng zawng lova a hun taka tan la turin Sawrkar a ngen tih a sawi a ni.

<><><>

YOUNGSTER ATTACKING DOCTORS

Indian Medical Association, Mizoram State Branch chuan inrinni zana an doctor pui Synod Hospital Durtlanga thawk mek Dr Laldinliana Sailo leh Dr Rinnggheta Renthlei ten sawisak rawn an tawk chu an lungawiloh thu sawiin a titute na taka hrem an phut.

Thuchuaha an tarlan danin ni 21 zana Synod Hospital Durtlang a thawk mek, Dr Laldinliana Sailo leh Dr Rinnggheta Renthlei ten khawih rawn tawkin damdawi in a dahluh hial ngaia sawisak an tawk chu an lungawi lo hle an ti a, Magisterial Enquiry din turin Sawrkar an phut tih sawiin an beisei anga hmalakna a awm lo anih chuan IMA in a tul angin hma a la dawn tih sawiin Sawrkarin a rang thei ang bera hma la ngei turin an phut tih an sawi bawk.

Police thuchhuah tarlan danin an hliam tawh dan chu Synod Hospital, Durtlang-ah uluk taka endik niin Dr. Laldinliana Sailo leh Dr. Rinnggheta Renthlei-te chuan hliam na tak an tuar a, Lalthlamuana erawhin vanneihthlak takin hliam na tak a tuar lo thung a ni. Investigating Officer hmalakna chak tak avangin he thubuaia thil tisualtua puh mi paruk 1) Lalmalsawma Zote (kum

25) Ramhlun North, 2) Mark Zairemmawia (kum 24) Ramhlun North, 3) Lalvenpuia (kum 22) Ramhlun North, 4) Sailianpuia Sailo (kum 28) Venghlui, 5) Vanlalpekhlua (kum 23) Ramhlun North leh 6) K.Vanlaltharzela (kum 23) Ramhlun North te chu ninin September 23 khan man nghal an ni a, an lakah thubuai ziahluh nghal a ni a. An thil tihsual hi in-bail theih a nih angin an vai hian bail in chhuah lailawk an ni leh tawh a ni.

Police thuchhuah tarlan danin thil tisualtua puh zinga pakhat Sailianpuia Sailo (kum 28) Venghlui hi Police tanglai, tuna Aizawl DEF hnuai Sairang Police Stationa thawk mek niin, a chungchangah disciplinary proceeding kalpui nghal a ni a, Superintendent of Police, Aizawl District thupek angin tunah hian ahna atanga chawlh lailawk tir nghal a ni bawk.



ELECTRIC VEHICLES

Transport Department chhinchhiah danin, Mizoramah Electric hmang lirthei, 554 a awm tawh.

Kumin September thla thlenga chhinchhiah danin, Mizorama Electric Vehicle Registration ti tawh chu a vaiin 554 a ni a, heng zingah hian a tam ber, 553 chu ke hnih nei niin, ke pali nei lirthei 1 a awm bawk a, tun hnaiah Electric vehicle hi a pung chak hle niin lirthei zuartute chuan an sawi a, electric hmang lirthei hian tuialhthei a mamawh loh bakah a enkawl senso pawh a tlem zawk a, lirthei pangai nena khaikhinin tuialhthei hman man aiin, electric a hman man chu a tlawm zawk niin an sawi a, Dealer thenkhat chuan Aizawl khawpui hmun pawimawh ah lirthei charge theihna point an siam tawh a, hmun tam zawka dah tum an awm bawk a ni.

Mizoram sorkar chuan tun thla ni 10 khan thuchhuah siamin, The Mizoram Electric Vehicle Policy 2024 hman tan a nih thu leh boruak thianghlim lo siam chhuak velo, Electric vehicle hman uar a nih theih nan, Electric hmang lirthei te hamthatna hrang hrang a lo tarlang tawh a, heng zingah hian intlanchhawkin Electric vehicle te a huam ve dawn loh thu te, lirthei park-na hmunah pawh an dahna tur hauhsak an nih dawn thu te leh hamthatna dang engemawzat tarlan a ni a, he Policy hian kum 2029 ah chuan Mizorama lirthei 5% tal Electric Vehicle nih tir a tum a ni.



KOLASIB LAND OWNERS' ASSN

Kolasib District Land Owner's Association chuan ram neitu nihna chingfel tura sawrkar phut nan naktuk zing dar 6 atangin NH 06 NH 306 Silchar leh Aizawl inkar kawngpui dan an tum.

Kolasib District Land Owner's Association thuchhuaha an tarlan dan chuan kum 3 chuang hma la thei lova an ram khuahkhirhna chu sut thuai se an duh a. Ram neitu nihna chingfel thuai tura sawrkar phûtin RRF Notification 1965 chu ram hmasawna daltu a ni tiin thiah ni se, an ti a. Four Lane Project pawh tihlawhtling tura phûtin, he'ng an thil phut hrang hrang te hian ngaih pawimawh a hlawh theih nan Silchar leh Aizawl inkar kawng chu dan ni se, tih an rel a ni.

An thuchhuah tarlan dan chuan tun hma atanga an lo in benbelna thin chu tunhnaia Four Lane kal tur avangin Forest Department chuan CA/NPV Compensation an duh avangin RRF Notification 1965 tlawhchhanin Vairengte leh Sairang inkar chu Roadside Reserve Forest tiin ram an rawn chuh buai thar leh, an ti a. Vairengte leh Sairang inkara cheng mipuite chu he dan avang hian an him lo tih sawiin mahni in, huan lo/ram tia an lo cheibawl chu Forest Dept.-in an chhuhsak niin an sawi a. RRF dinchantir tuma hmalakna awm mek chu tha ti lovin an dodal zel dawn tih an sawi a ni.

Ram neitu intelkhawm chuan kum 2020 atangin Four Lane ram lak tur avangin sawrkarin an ram chu khawih theih lohin an khuahkhirhsak an ti bawk a. Chhungkaw tam takin eizawn nana an hman an huan thlai enkawl zui thei lovin an dikna leh chanvo rahbehsak an ni, an ti a. An dikna leh chanvo nawr chhuak tura Road Block hial a lo ngai ta chu pawl an tih thu sawiin Mizoram mipuite hriatthiamna an ngen tih an sawi bawk.

<><><>

ASOSAI

President Draupadi Murmu-i chuan tunlai thiaman technology thang chho zel milin Audit dan pawh insiamrem chhoh zel a ngai a ti. Vawiina Asian Organisation of Supreme Audit Institutions (ASOSAI) Assembly vawi 16-na New Delhia a hawannaah he thu hi sawiin Pi Murmu-i chuan sawrkar sum audit na pawh tihlen niin mipui hamthatna tur welfare scheme leh project te mipuiin an chhawr em tih thlenga endik tir a ni tawh a ti a. Technology thang zel khawvelah hian sawrkar hna pawh technology hmang tangkaia thawh a tam tawh a ni a ti bawk.

President chuan khawvelin digital technology lo hmasawn zelah hun pawimawh tak a tawng mek tih sawiin tunlai sawrkar inrelbawlina kawngah a phena hmanraw pawimawh tak an ni tawh a ti bawk. Ni li aw h tur Assembly ah hian Audit chungchanga thil pawimawh tam tak sawiho a ni dawn a. ASOSAI ah hian Comptroller and Auditor General of India ni lai Girish Chandra Murmu chu chairman niin kum 2024-2027 chhung he chanvo hi a chelh dawn a. Tun tum Assembly ah hian ram 42 atangin palai 200 chuang an kalkhawm a. Khawvel pawl lian tak takte an tel a ni.

<><><>

EAM

External Affairs Minister Dr.S.Jaishankar-a chuan vawiin khan Bangaldesh Foreign Affairs Advisor Touhid Hossain chu New York-a UN General Assembly neih karlakah a kawm. Tun tum hi Bangladesh-a Mohhamad Yunus-a kaihhruai Interim Government din anih hnua India leh Bangladesh sawrkar hotulu inbiak hmasak ber a ni a. Hruaitu pahnihte hian India leh Bangladesh inlaichinna leh an thawhdunna hrang hrangte an sawidun a ni.

<><><>

SRI LANKA NEW PM

Sri Lanka National People's Power MP, Dr. Harini Amarasuriya chu vawiin khan Prime Minister thar atan lakluh a ni. Nimin khan President atan Anura Kumara Dissanayake lakluh alo ni tawh a. Vawiin lakluh inkhawm hi Presidential Secretariat ah neih a ni a. Prime Minster Amarasuriya rual hian cabinet minister atan NPP MP Vijith Herath leh Lakhsman Nipun Arachchi te lakluh tel an ni bawk.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang.Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

